

欽定大清會典事例

欽定大清會典事例卷六百十三

兵部

八旗處分例

人命  
雜犯

監獄

提解

用刑

人命。○原定八旗兵丁。並無私讎別故。因公事  
教訓。將該管官殺死者。該佐領驍騎校。罰俸二  
年。參領著參領。罰俸一年。都統副都統。罰俸六  
月。族長領催。鞭一百。有因私讎殺死。或因公挾  
忿。持刀致傷該管官者。該佐領驍騎校。罰俸一  
年。參領著參領。罰俸六月。都統副都統。罰俸三  
月。族長領催。鞭八十。如係前鋒護軍步軍。有犯

將前鋒統領護軍統領步軍統領翼尉。照都統副都統例議處。前鋒參領侍衛護軍參領署參領步軍協尉副尉。照參領例議處。前鋒校護軍校步軍校同佐領驍騎校一例議處。族長領催各分別鞭責。其本旗都統參領等皆免議。閒散人因公挾忿持刃致傷該管官者。該佐領驍騎校罰俸六月。參領署參領罰俸三月。都統副都統罰俸一月。族長領催鞭五十。殺死者該佐領驍騎校罰俸一年。參領署參領罰俸六月。都統副都統罰俸三月。族長領催鞭八十。凡族長係

官。皆照驍騎校例。罰俸。外省駐防兵丁及閒散  
人有犯殺死及致傷該管官者。該將軍都統副  
都統。照在京都統例議處。協領參領總管城守  
尉防守尉。照在京參領例議處。佐領防禦驍騎  
校。照在京佐領例議處。○又定八旗滿洲官兵  
及閒散人互毆致死。將該佐領驍騎校。罰俸一  
年。參領著參領。罰俸六月。都統副都統。罰俸三  
月。領催族長。鞭八十。如係前鋒護軍步軍有犯  
將前鋒統領護軍統領步軍統領翼尉。罰俸三  
月。前鋒參領侍衛護軍參領著參領步軍協尉。

副尉罰俸六月。佐領前鋒校護軍校。驍騎校步軍校。罰俸一年。領催族長鞭八十。其本旗都統參領等皆免議。族長係官。照驍騎校例。罰俸。若奴僕毆人致死。其主鞭八十。係官。照驍騎校例。罰俸。該管官免議。至於內務府王公府屬佐領及內管領下滿洲。與正戶人互毆致死。該管大員及該管官。亦照此例議處。若因公差遣之處互毆致死。將領去之。該管各官。照在京該管大員及該管官例。議處。其屯莊居住旗人互毆致死。將屯領催鞭八十。在京該管各官皆免議。八

旗蒙古漢軍及外省駐防均照此例。○又定步軍校等所管地界內有路死之人該步軍校不開明情由具報刑部者罰俸六月。○又定旗員因事威逼人命致死者革職若子弟奴僕與人鬪毆該員前往救護口角被人毆傷毆官之人懼罪自盡者將救護之官罰俸一年。○又定八旗該管地方有持刃傷人者首孥之人賞銀十五兩其次賞銀十兩第三人賞銀五兩如但持刃未致傷人者不賞。○雍正二年議准旗員將奴僕責打身死審非故殺者罰俸二年故殺者

降二級調用。加級紀錄不准抵銷。持刀殺死者。革職治罪。如家主占奪奴僕之妻。或圖姦未遂。毒毆致死。審有確據。及本家主自認不諱者。革職治罪。若將奴僕打死。隱瞞不報部者。革職。私用夾棍。拶子。拷逼奴僕者。罰俸六月。致死者。革職。用刀背責打奴僕者。罰俸九月。故殺族人。奴僕者。降三級調用。加級紀錄不准抵銷。毆殺者。降二級調用。皆追人一口。給付死者之主。持刀殺死者。革職治罪。○又議准八旗自盡命案。已經驗明。令其槿送。如有勒索攔阻者。該汛及城

門直班官兵拏送刑部治罪。若知而不拏。將直班官罰俸一年。兵鞭五十。○又議准。西四旗游牧察哈爾總管所屬蒙古。有關命案議處者。皆照八旗官兵及閒散人互毆死例。將專管之佐領。駙騎校。照八旗佐領。駙騎校例。議處。兼轄之參領。照八旗參領例。議處。總管副管。照八旗都統。副都統例。議處。太僕寺牧廠等官。有關命案議處者。將專管之協領。兼轄之翼領。統轄之總管。照此例分別議處。○十三年議准。奉天各城旗民。有犯命案者。各該管官訪知確實。一面行



文關會。一面差役持票徑行拘拏。如管民官行文關會。該旗員有心牽制。不即增差協拏。致兇犯遠逸者。降二級調用。屯領催不協力擒拏。以致脫逃者。鞭八十。如受財故縱交。

盛京刑部治罪。其旗員該管地方有殺死人命。失於覺察。不行申報者。該管官降一級留任。該管上司免議。如知情隱匿不申報者。經管民官詳揭。將該管官革職。城守尉隱匿不揭報者。降三級調用。該將軍副都統不查叅者。罰俸一年。若城守尉並不知情。止於失察。同城者。降一級留

任不同城在百里以內者。罰俸一年。百里以外者。罰俸九月。該將軍於題叅時。將或係知情。或係失於覺察。及道里遠近。於疏內詳細聲明。以憑覈議。如該管官於命案先因不知未報。後即查出通報。將本案審明者。不論年月遠近。皆免議。○又議准奉天命案。遇有例應議處議敘者。城守尉照督緝例。與奉天理事通判錦州府知府。一例定議。佐領防禦等官。照承緝例。與州縣一例定議。驍騎校與吏目典史等官。一例定議。○乾隆七年覆准。東四旗游牧察哈爾總管所

屬蒙古。遇有命案。照西四旗例。分別議處。○二十四年。奏准吉林黑龍江駐防旗員。遇有命案。照奉天命案例。議處。○三十五年。奏准旗員用。刀背責打奴僕者。降一級調用。如將贖身及放出奴僕。並奴僕之子女毆殺者。降三級調用。加級紀錄。不准抵銷。非故意毆殺者。降一級調用。○嘉慶六年。奏准八旗領催甲兵傷斃人命。該佐領。驍騎校。各降一級留任。若一時傷斃三四命以上者。該佐領。驍騎校。各降一級調用。參領。副參領。各罰俸一年。都統。副都統。各罰俸六月。

如前鋒護軍步軍有犯將前鋒統領護軍統領  
步軍統領總兵翼尉照都統副都統例議處營  
總前鋒參領侍衛護軍參領副護軍參領步軍  
協尉副尉照參領例議處前鋒校護軍校步軍  
校照佐領驍騎校例議處其本旗佐領驍騎校  
仍各罰俸一年領催族長鞭八十都統參領等  
均免議若因公差遣之處傷斃人命將領去之  
該管各官照在京該管大臣及該管官例議處  
在京該管官免議其閒散人傷斃人命該管佐  
領驍騎校各罰俸一年若一時傷斃三四命以

上者該佐領驍騎校各降一級留任參領副參領各罰俸六月。都統副都統各罰俸三月。領催族長鞭八十。至包衣佐領及管領下兵丁閒散有犯該管大臣官員俱照前例議處。外省駐防亦照此例行。○又奏准發遣新疆駐防為奴當差人犯逞兇斃命將約束不嚴之該管官降一級留任領催鞭一百。家主係官照該管官例議處。無職人照領催例鞭責。兼轄協領罰俸一年。統轄大臣罰俸六月。○又奏准八旗兵丁私覓閒散人等頂替該班因而毆斃人命者除該兵

及毆斃人命之犯。照例治罪外。將不實力稽查之該管官。降一級留任。兼轄官罰俸一年。○又奏准旗員將贖身及放出奴僕。並奴僕之子女。故意毆殺者。仍照舊例議處。非故意毆殺者。降二級調用。俱以私罪論。○又奏准駐防旗員所屬兵丁。遇有過失。應鞭責而違例用板責。未致死者。該管官罰俸九月。因而激忿自盡者。降一級留任。不能約束之兼轄上司。罰俸一年。其兵丁酗酒滋事。不服管教。該管官任性責打。因傷致死者。降一級調用。不能約束之兼轄上司。降

一級留任。如兵丁犯法。不移送有司審辦。挾嫌責打致死者。該管官革職提問。不能約束之上司。降一級調用。查出揭報者。降一級留任。○又奏准八旗步軍營所管地方。私埋人命。該汛兵丁徇私受賄。隱匿不報。訊係謀害律。應擬抵者。失察之該管地方官。均降二級調用。若訊無謀害情事。因屍主願免報官。因而賄屬兵丁私埋者。該管地方官。均降二級留任。○又奏准八旗步軍營所管地方。有路斃屍身。居民畏累。私行挪移者。失察之該管地方官。罰俸一年。兵丁明

知移屍希圖推却。隱匿不報者。鞭八十。該管地方官降一級留任。兼管上司。罰俸六月。如兵丁受賄。將因傷致死屍身。私移匿報者。革退治罪。該管地方官降一級調用。兼轄上司。罰俸一年。若兵丁在堆撥處所。逞兇謀命。復將屍身私移別處者。除兵丁照例究辦外。該管地方官降二級調用。兼管上司。降一級留任。統轄上司。罰俸一年。如在該班處所斃命移屍。該管直班官降二級調用。不能查拏之該地方官降一級調用。兼管上司。罰俸一年。又奏准。駐防旗界地方。



有受傷身死無名之人。驗有失物情形者。照盜案題參。按限議處。若並無失物。以初報到官之日起。扣限六月緝拏。限滿無獲。將承緝之該管旗界官。照命盜緝兇不力例議處。日後查係盜殺。仍照盜案例。補參議處。若接緝官能於限內拏獲兇犯一名者。紀錄一次。數多者遞加。○又奏准。駐防旗員任內。遇有承緝命案未獲。例應限緝展參者。不准升遷離任。如有將承緝之員。已經勒限緝拏。錯擬保送者。除本員撤回本任。仍令限緝外。將違例保送之該管上司。降一級。

留任。該管大臣。罰俸一年。○十三年奉

旨。護軍舒靈於進班時。持刀傷人。該參領忠傑並未能嚴行管束。實屬咎有應得。行在兵部。僅議以罰俸六月。未免過輕。鑲白旗護軍參領忠傑著實降一級調用。嗣後行營兵丁。有似此在卡內持刀傷人。該管官即照此例議處。○十四年奉

旨。東安門內北河沿。切近禁城。該步軍校色普興額有巡緝之責。乃於殺傷人命案情。漫無覺察。非尋常疏玩可比。色普興額著革職。不必交議。其翼尉協尉等。著交部分別議處。嗣後皇城內地面。如有謀殺人命。

之事。專緝之步軍校。即照此辦理。○道光十二年題  
准。旗人鬪毆成傷。並未報驗。至因傷身死。始行  
具報。將報驗遲延之佐領。驍騎校。均罰俸九月。  
兼轄協領。並未查出稟辦。罰俸六月。○光緒四  
年題。准。旗員承審案件。雖無袒護情弊。而偏執  
己見。以致釀成命案者。降二級留任。失於詳察  
之該管上司。罰俸一年。統轄官罰俸六月。

監獄。○順治年間定。旗員看守監牢。因事耽延  
空班。或不交與接班之人。私自回家者。降一級  
罰俸一年。○又定。旗員看守重犯監牢。不嚴聽

全無約束。以致人犯辱官詐財生事不法者革職。若該員隱匿不報。該管上司未經查出者。罰俸一年。該員已報。該管上司不為轉報者。降二級調用。統轄之將軍都統副都統等。據報不行查叅者。降一級調用。○又議准。旗員將應解人犯。錯解別處者。罰俸六月。○乾隆二十四年奏。准八旗察哈爾官員承緝在逃兇犯不力。照內地無墩鋪防兵例。以事發之日起。勒限六月緝拿。不獲。該都統等查叅送部。初叅停升。二叅罰俸一年。三叅罰俸二年。四叅降一級留任。兇犯

照案緝拏。其官員接緝未獲兇犯。照內地接緝例。以到任日起。勒限一年緝拏。拏獲免議。不獲罰俸一年。兇犯照案緝拏。○四十九年奏准。奉天省押解尋常命盜等犯。由各州縣自行選役押解。如遇拏獲新疆逃遺。並兇盜等重犯。該州縣差役長解外。每犯一名。就近移旗。撥兵二名護送。按程更替。如有疏虞。照僉差不慎例。分別辦理。○嘉慶六年奏准。旗員解送及看守。應交刑部重犯。縊死自盡者。罰俸一年。軍流以下人犯自盡者。罰俸九月。○又奏准。旗人酗酒滋事。

須分別情節。或應自行責懲。或應送部發遣。該管各官呈送不實。降一級留任。○道光二年奏定。發遣人犯至五名以上者。每五名作一起。先後解送。押解官役嚴加約束。在途毋任生事。擾累地方。○又定。軍流遣犯未經起解者。夏六月。冬十月至正月。停其發遣。若已至中途者。夏六月亦准停遣。初冬十月。照常接遞。至十一月初一日。方准停遣。俟次年二月起解。如抵配所不遠。本犯情願前進者。將不停遣緣由。移咨前途一體接遞。其情罪重大者。不准停遣。○二十六

年議推遞解斬絞監候重犯中途脫逃如短差兵丁未加肘鎖疏脫一名者該管官降一級調用。二三名者降二級調用。四五名者降三級調用。如並未短差兵丁已加肘鎖疏脫一名者該管官降一級留任。二三名者降二級留任。四五名以上者降三級留任。俱限一年緝拏限內拏獲准其開復不獲照所降之級調用。發遣新疆等處人犯脫逃例應正法者中途脫逃係短差兵丁未加肘鎖者疏脫一名該管官降一級留任。二三名降二級留任。四五名以上降三級留

任俱限一年緝拏。限內拏獲。准其開復。不獲。照所降之級調用。如並未短差兵丁。已加肘鎖。疏脫一名者。該管官降職一級。二三名者。降職二級。四五名以上者。降職三級。俱限一年緝拏。限內拏獲。准其開復。不獲。照所降之級留任。逃犯。照案緝拏。軍流人犯。及遣犯。例不正法者。中途脫逃。係短差兵丁。未加肘鎖。疏脫一名者。該管官罰俸一年。二三名者。罰俸二年。四五名以上者。降一級留任。如並未短差兵丁。已加肘鎖。疏脫一名者。該管官罰俸六月。二三名者。罰俸一



年四五名以上者。罰俸二年。逃犯俱照案緝拏。  
○同治元年議准。員弁奉差解送人犯。不親身  
前往。私倩同官代替者。降一級調用。其代替之  
員同罪。失於查出之該管官。罰俸六月。該管大  
臣。罰俸兩月。○十三年議准。官員門丁被控。經  
上司提取審訊。若藉詞搪抵。延不送案。該上司  
以玩誤揭叅者。降一級留任。○光緒四年議准。  
卓索圖。昭烏達兩盟各旗。如有玩視重案。不遵  
例限辦理者。熱河都統即時奏叅。如有延閣遺  
漏。未即奏叅者。該都統降二級留任。儻係知情。

有意延閣不叅降三級調用。

用刑。○原定凡旗員拏獲人犯。應送有司審理者。不許越俎。若係應行審理之案。擅用非刑。或將婦女夾訊者。不論致死未致死。皆革職。該管上司不據實查報者。降一級調用。該將軍都統副都統不提叅者。降一級留任。若將孕婦擅拶者。降一級調用。該管上司不據實查報者。罰俸一年。將軍都統副都統不題叅者。罰俸六月。其番役兵丁私用非刑害人。該管官不能查究者。革職。○又定旗員因步軍禁止夜行。擅拏至家。

中拘禁毆打者。審實革職。傷損者。革職交刑部治罪。延醫祭祀嫁娶燕會行走。步軍故意抑勒不肯放行者。步軍鞭五十。因被步軍抑勒即行責打有傷者。罰俸六月。○又定。佐領非係公事將佐領下男婦無故責打者。罰俸一年。挾讎責打者。降一級。罰俸一年。如因需索不遂責打者。革職。嚇詐財物者。革職治罪。○又定。閒散人辱罵職官。該員不送該管官懲治。竟行責打損傷者。罰俸三月。○嘉慶六年奏准。八旗遇有虧空賠補追贓。稽查家產雜犯等案。概不許提訊婦

女僕有濫行提訊者以違

制律論罪該管都統等徇隱不行究參降二級調用如係失察罰俸一年○道光二年奏定官員犯罪未經奏參奉

旨拏問者不許擅自鎖禁妄行拏禁者革職

雜犯○原定旗員鬪毆至折傷以上及屬官毆該管官者皆革職治罪若該管官擅毆屬官者降三級調用不相統屬之官彼此互相鬪毆者革職奴僕有犯毆辱官員者除照律治罪外家主係官罰俸兩月○又定屬官惡言罵詈本管

官者革職。至奉委稽查之員。雖向無統屬。若於稽查時。罵詈稽查官者。降一級。罰俸一年。稽查官於稽查處。混行罵詈者。罰俸兩月。○又定八旗有買良為倡。或將家下婦女。故縱為倡者。倡婦入官。其主係官。革職。枷一月。鞭一百。不准折贖。常人。枷三月。鞭一百。至家人將伊自置。僕婦故縱為倡。亦枷三月。鞭一百。其主不知情者。係官。降一級。留任。仍罰俸一年。常人。鞭一百。知情者。係官。革職。枷一月。鞭一百。常人。枷三月。鞭一百。族長。係官。罰俸一年。常人。鞭一百。領催。鞭一

百。驍騎校罰俸一年。佐領罰俸六月。參領罰俸三月。都統副都統罰俸一月。城內交與步軍統領翼尉協尉副尉步軍校查拏。若不行查拏。或被旁人拏獲。步軍校罰俸一年。協尉副尉罰俸六月。翼尉罰俸三月。統領罰俸一月。○又定凡聚眾搶奪路行婦女。及以藥餅撲項邪術。迷拐男婦子女。將失察之該汛步軍校罰俸一年。步軍協尉副尉罰俸六月。如八旗佐領下人有犯此等者。將失察之該佐領驍騎校罰俸一年。領催鞭八十。內務府佐領內管領下人。有犯此等

者。將失察之該內管領。副內管領。佐領。驍騎校。罰俸一年。領催鞭八十。○又定。旗員將禁止處。番僧私請至家治病。令其過宿者革職。○又定。旗員因公出差。其帶去兵丁。有患病事故。不交。明彼處該管官。將兵丁私留差所。本員先回者。罰俸一月。○又定。旗員誣告人罪。審屬全虛。照律分別加等。如告二事以上。輕事審實。重事審虛。或告一事。誣輕為重者。皆反坐所贖之罪。若告二事以上。重事審實。輕事審虛。及數事罪本相等。但一事告實者。皆免罪。○又定。旗員初次。

叩

閩審虛者。罰俸九月。若已經叩

閩審虛。復稱冤枉。叩

閩者。降二級調用。常人交刑部治罪。若於原詞之外。復捏造言語。叩

閩審虛者。除照例處分外。係官再降二級調用。

又定。被告證佐旗員。徧徇捏供。誣人至死罪者。革職。流罪降三級調用。徒罪降一級調用。杖罪罰俸一年。笞罪罰俸六月。○又定。京城內外黏貼匿名揭帖。該步軍校等不即查拏。別經發覺。



將步軍校罰俸一年。協尉副尉罰俸六月。翼尉  
罰俸三月。統領罰俸一月。○又定。旗員將已嫁  
之女。經部斷不准離異。仍留在家不送回者。罰  
俸兩月。若已斷離異。不行領回。復行強送毆塔  
者。罰俸一年。○康熙三十一年議准。外省駐防  
旗人。有犯串結土豪。放債盤利。開賭詐騙。準折  
子女。強買市肆。擅砍樹木。闕市辱官者。依律治  
罪。如犯至枷三月。鞭一百之罪者。將該佐領防  
禦。驍騎校。降二級調用。協領參領城守尉。降一  
級留任。將軍都統等。罰俸一年。如協領以下。驍

騎校以上各官。有本身自犯此等罪者。皆革職治罪。該將軍。都統等。降一級留任。佐領以下各官。有犯該管協領參領城守尉防守尉。降二級調用。將軍都統等。罰俸一年。若各官縱子為惡。有犯此等罪者。降二級調用。該管各官。降一級留任。將軍都統等。罰俸一年。至奴僕有犯此等罪者。家主係官。照佐領例議處。常人鞭一百。該管各官。皆免議。○三十八年議准。旗員宿倡者。革職。姦家下有夫之婦者。降一級。罰俸一年。姦軍民妻者。革職。強姦軍民妻及姦官員妻者。革

職治罪。拏獲姦夫姦婦私放者。罰俸一年。得財者革職。○又議准。旗員將有夫之婦知而娶者。革職。不知者免議。○乾隆二十四年。奏准。官員閒散人等。有縱容婦女入寺及隨入善會者。經步軍統領衙門拏獲。詢明縱容之人。係官叅奏。交部議處。兵丁閒散責懲。○又奏准。外國進貢方物。押送官員怠玩損壞水溼者。罰俸六月。○又奏准。八旗官兵。看守倉庫與外藩進貢人之馬匹。若有匪類強索該班兵丁錢財。代為看守。該班處專管官不行查拏者。罰俸一年。失察之

該旗大臣罰俸三月。○二十六年奏准。八旗瘋病之人。該佐領不嚴飭親屬族長人等鎖錮看守。以致瘋病之人自殺者。罰俸三月。致殺他人者。罰俸一年。○又奏准。官員有隨入善會者。經步軍統領衙門拏獲。參奏。交部議處。○三十九年議准。嗣後無論內城外城戲園。概不許旗人潛往遊戲。各旗該管大臣步軍統領衙門。五城御史一體稽查。如有旗人擅入戲園。一經拏獲。除將本人照例懲治外。並將管束不嚴之該都統等。交部議處。○四十九年奏准。旗員禁止赴

園聽戲違者。查係各營官兵。即將該營大臣。交部議處。該管都統副都統免議。如係參領佐領等官。及閒散世職人員。即將該管之都統副都統。交部議處。若係驍騎校以下人等。將該管參領佐領。一併送部議處。○嘉慶六年奏准。官員宿倡姦軍民妻及強姦者。本人革職治罪外。上司徇隱不參。降三級調用。失察者。該管各官降一級留任。自行查出。及官員姦家下有夫之婦者。上司俱免議。○又奏准。官兵閒散人等有縱容婦女入寺及隨入善會者。係官降一級留任。

常人鞭六十。○又奏准。官員有隨入善會者。降一級留任。○七年奏准。

盛京吉林黑龍江等處番役有以巡緝為名。藉端索詐。擾害旗民。番役手下散丁人等。冒充番役生事詐財者。該管官不行查究。降二級調用。將軍副都統。罰俸一年。如該管官不將冗役裁革。或不行嚴察。致有匪徒假借番役之名。在外擾害者。該管官降一級調用。將軍副都統。罰俸六月。○又奏准。旗人有入園館看戲縱飲者。係各營官弁。將該營大臣罰俸六月。係參領佐領等

官及閒散世職人員。將該管都統副都統罰俸六月。係驍騎校以下人等。將該管佐領罰俸一年。參領副參領罰俸九月。都統副都統罰俸六月。○又奏准。奉委稽查官。於稽查處擅行罵詈者。罰俸一年。○又奏准。八旗官兵人等。任意居住城外。係官罰俸一年。係兵鞭五十。失察之該管各官。俱罰俸九月。○又奏准。外省駐防旗人。有犯串結土豪。放債盤利。開賭詐騙。準折子女。強買市肆。擅砍樹木。關市辱官等罪者。如係兵丁。將該佐領防禦驍騎校。降二級調用。協領總

管城守尉降一級留任。將軍都統副都統罰俸一年。如係閒散將該佐領防禦驍騎校降一級調用。協尉總管城守尉罰俸一年。將軍都統副都統罰俸六月。如係協領等官有犯將該將軍都統副都統降二級調用。佐領以下官員有犯將該管協領參領總管城守尉各降二級調用。將軍都統副都統降一級留任。驍騎校有犯將該佐領防禦等降二級調用。協領參領等降一級留任。將軍都統副都統等罰俸一年。如官員縱子作惡犯此等罪者照舊定議該管各官照



本例議處。○又奏准八旗惡棍經刑部審實。將失察之該佐領驍騎校每名罰俸兩月。領催鞭五十。三名以上者。佐領驍騎校罰俸六月。領催鞭一百。○又奏准旗員因私事擅差甲兵。以致在外滋事者。降一級調用。○又奏准迷失幼童。幼女。巡捕營各衙門。一面通行各直省查緝。一面飭屬並遴選幹捕。嚴緝姦拐。並收留不報之人。如該管武職果實力緝獲者。按拏獲名數議敘。一、二名者。紀錄一次。三、四名者。紀錄二次。五、六名以上者。紀錄三次。若該地方有窩拐誘拐。

及收留不報之人。不行查拏。將該管各官。亦按窩誘收留名數處分。一二者。罰俸六月。三四名者。罰俸一年。五六名以上者。降一級留任。儻姦徒誘拐之人。在遠方轉賣。經地方官拏獲。供出曾在某地方容留者。將拏獲與容留之各該地方專汛武職。照前例。分別議敘議處。○又奏准。幼童迷失。或逃或拐。情節未明。應俟緝獲之日。審係誘拐。方行照例。分別議處。○又奏准。外省地方。如有匪徒。以藥餅撲項邪術。迷拐男婦子女者。將不行查拏之專汛武職。罰俸一年。兼

轄官罰俸六月。統轄官罰俸三月。○又奏准。該管武職將迷拐人犯實力緝獲者。免其失察處分。准予紀錄一次。其別處地方員弁有能盤獲者。准其紀錄二次。○又奏准。外省城內。如有惡棍在街藉端挾詐。勒騙錢財。攪擾肆市行兇者。責令城內該管營員。每日巡查緝拏。如明知惡棍在境滋事。不能查拏者。專汎兼轄各官俱革職。得財私縱。誑稱失脫者。革職提問。如不知情。失於查拏者。專汎官降一級調用。兼轄官罰俸一年。外省地方鎮店邨莊專汎武職失於查拏

者降一級留任。兼轄官罰俸六月。儻係專汎官明知惡棍在境生事不行查拏者降二級調用。兼轄官降一級留任。受賄私縱者革職提問。專汎官賄縱兼轄上司不能查出訪拏者降一級調用。自行訪出查拏者俱免議。○又奏准地方遇有審辦各項罪犯。經兵役緝獲。在途被匪徒糾夥搶奪。毆傷兵役者。該督撫照盜案例扣限題叅。將疏防各官照道路邨莊失事例。分別有無墩鋪議處。以四叅完結。如有隱匿不報。照諱盜之例議處。○八年奉

旨。此案失察會匪糾眾焚劫。與尋常失察案件不同。副將薩哈蘇署副將事。參將張士英。都司全保。均著降二級調用。不准抵銷。嗣後文武官有失察邪教會匪滋事重案。應議以降調者。均按所降之級實降。毋庸查級議抵。著為令。○十六年議奏。旗人如有潛習西洋教者。失察之該管官。照地方官之例。降二級調用。兼轄官降二級留任。統轄大臣降一級留任。如該管官自行查拏者。免議奉

旨。吏部兵部會奏。覈議西洋人傳教之地方文武各官處分。均著照所議行。至旗人等居住京城。尤應遵守

法度該管官耳目切近亦易於稽查如有傳習西洋教者本人既應加等治罪其失察之該管官亦應從重議處所有部臣原議失察旗人潛習西洋教之該管官降二級調用著改為降三級調用兼轄官原議降二級留任著改為降三級留任統轄大臣原議降一級留任著改為降二級留任

謹案此例於同治初年冊

○道光

### 二年奏定

盛京等處旗人在京身故祖墳遙遠不能扶柩送回呈請火化歸葬者由該佐領申報該旗都統咨明步軍統領衙門派員驗看火化在京在外

旗人奉差告假出外身故。因路途遙遠無力扶  
柩送回。呈明該處官員火化攜回。其餘一概不  
准火化。違者按律治罪。族長及佐領等隱匿不  
報。照例議處。○又定有圖利小人在教場處掘  
土者。該管教場官即行拏交刑部治罪。如該管  
官不行查拏。照例議處。○又定官員親保族內  
孀婦守節。復行毆傷。逼迫致死者革職。交刑部  
治罪。如未曾毆傷。因一時口角自盡者降一級  
留任。罰俸一年。強取孀婦房產者革職。其孀婦  
守節。應承受家產之官。勒指不保者降一級留

任。若現在孀婦徑行歸併自己檔內者。罰俸一年。○九年奏定。凡步軍營地方。遇有錢鋪姦商。誑騙銀兩。一經具報該地方武職。即行飛速嚴拏。詳送究辦。如失於查拏。以致姦商逃逸者。步軍統領勒限兩月查叅。限滿不獲。將該汛步軍校住俸。兼轄之步軍協尉。罰俸六月。限一年緝拏。二叅限滿不獲。將該汛步軍校降一級留任。兼轄之步軍協尉副尉。罰俸一年。汛地步軍各鞭一百人。犯照案緝拏。○十年

諭。朕聞盛京將軍奕顯有演戲會燕之事。特命富俊等



前往詳查。茲據奏稱沿途採訪輿論。知瀋陽本城有  
弋腔戲班。近又到一徽班。將軍府內時常演劇。比到  
省密訪相同。並查得該將軍服用一切。諸近奢華。務  
耽豐美。副都統常明。亦喜演戲燕會。性近奢靡等語。  
盛京為根本重地。風俗素稱淳樸。將軍副都統表率  
一方。遇有旗民及地方官吏。習尚澆漓。尚應力加整  
飭。乃竟時常燕樂。自蹈繁華。豈能勝將軍副都統之  
任。奕顯常明。著交宗人府兵部嚴加議處。即來京聽  
候部議。富俊著暫留盛京。著理將軍印務。陪都地方。  
斷不容戲班聚集。日趨侈靡。著富俊即將盛京城內。

外所有戲班雜劇概行驅逐飭令地方官嚴行查察嗣後再不准潛行入境每屆年終著該將軍會同五部侍郎奉天府府尹將境內並無戲班之處聯名具奏如再查有潛留之事惟該將軍等是問○十二年

奏定旗人犯盜犯竊及登臺唱戲寡廉鮮恥有玷旗籍者連子孫一併銷除旗檔窩竊窩倡窩賭及誣告訛詐行同無賴不顧行止並棍徒擾害教誘宗室為非造賣賭具捏造假契行使假銀描畫錢票代賊銷贓一切誑騙取財以盜竊論銷除旗檔照民人例徒流軍遣一體問擬如

有心開脫者。以故出人罪論。○十三年議准。旗人妄遞匿名封章。失察之該管參領副參領佐領均降一級留任。都統副都統罰俸一年。○十六年議准。京城城門官兵。故縱蠹棍姦牙運米出城回漕各犯。被順天府拏獲。審有兵丁得贓官弁知情者。門領門千總。門吏均革職。交刑部治罪。漫無覺察之翼尉副翼尉降二級留任。不准抵銷。步軍統領暨該翼總兵均罰俸一年。○又題准。凡誘拐人犯在逃。承緝官勒限六月緝拏。逾限不獲。罰俸一年。人犯照案緝拏。○十七

年題准東三省地方。如有錢鋪姦商廣出虛票。互相勾結。盈千累萬。輾轉磨兌。迄無現錢開發。商民均受其害者。失於查禁之地方官。降一級留任。○十九年議准。現任官員不自檢束。輒至茶館飲茶聽書者。降三級調用。○二十年議准。東三省管理地方官員。如違例於屯界內令商民開設燒鍋。並發給執照者。降一級調用。○二十六年議准。八旗步營地方。如有偷竊官銅。售賣人犯。該管地面官。失於查拏者。罰俸一月。○

同治二年題准。

盛京解送鹿羔。若餽養不善。以致倒斃多隻。不敷額數。經管之員。降一級留任。○十三年題。舊呈交貢物官員。中途與人口角。捏報貢物被搶。藉端圖賴者。降二級調用。○光緒四年議。准東三省旗員。有管理地方之責者。如於所屬境內。民間私種罌粟。不即查禁。罰俸一年。儻有知情。故縱收取費用者。降三級調用。

欽定大清會典事例卷六百十四

兵部

綠營處分例

考察軍政卓異  
武職薦舉  
軍政糾劾

考察。原定軍政五年舉行一次。將上屆軍政以後所行之事並事故。詳行開註。副將以下各官。屬總兵官管轄者。總兵官註考。不屬總兵官管轄者。該副將參將等官註考。其註考時。將各官履歷賢否實蹟。造具清冊。填入考語。徑送督提等。再詳加考覈。確定去留。造冊密封送部。其應自陳之提督總兵官。與各官文冊起送之日。

一併自陳。在內鑿儀衛漢鑿儀使。令其自陳。冠軍使以下。整儀尉以上等官。由滿漢堂官註考。

造冊密封送部。巡捕三營。

乾隆四十六年奉  
准。添設巡捕五營。

將

備及各門千總。由步軍統領註考。造冊密封送部。直省衛所經管錢糧各官。由布政使司及糧道詳註考語。密呈督撫。督撫再詳加考覈。造冊密封送部。○康熙十一年議准。軍政考語。含糊參差。及將應註考者不註。不應註者註考。或開報年歲不符。並失註去留者。督撫提鎮罰俸六月。申報之該管官罰俸一年。○三十六年

論軍政大典五年一舉。所以黜陟將弁。砥礪官方。使賢

者知勸。而不肖者知儆。關係甚重。每見督撫提鎮不能實心奉行。輒向所屬需索部費。恣意誅求。因而將弁以下。節次侵削。重為兵害。至於所舉所劾。或瞻徇情面。或曲庇私交。將扣剋額餉。虛冒兵糧。濫受餽遺。虐取規例。委係貪酷。及衰懦闇茸。不能騎射之人。不行糾劾。止將微員細事。草率塞責。以致貪婪庸劣之輩。無所戒懲。而守法奉公。宣勞盡職者。抑遏不揚。無所激勸。殊負朝廷旌別淑慝之意。可即通行各督撫提鎮。此次舉行軍政。務矢公矢慎。力破積弊。俾舉一



人衆皆以為賢。劾一人衆皆以為不肖。庶激揚咸當。而國家允收得人之效。儻因仍陋習。不知悛改。後有發覺。定將該管官一併從重治罪。○又議准官員值軍政之年。有藉端科斂者。革職提問。若該管官知而隱匿不揭報者。革職。如已經揭報。該提鎮不題叅者。降五級調用。○雍正元年

諭。五年舉行軍政。其居官優者。列為卓異。劣者。分別重輕。置之八法。所以澄敘官方。勸善懲過。典至重也。朕思卓異八法。所舉所劾。不過十數人。而平等供職。不列舉劾者。尚多。如武官騎射之優劣。訓練之勤惰。皆

未填註考語。是考課尚有遺漏之處也。嗣後軍政除卓異八法。照舊例舉行外。其平等官員。自守備以上。皆於軍政之年。令督撫提鎮註明考語。造冊詳報兵部。務期秉公覈實。不得徇情任意。顛倒是非。○又議准不入舉劾武官。自守備以上。詳開履歷。造具文冊。並將該員散給兵餉。訓練營伍。騎射年力。緝盜安民。各如何之處。由該管官詳細填註考語。至衛所官經手錢糧。有無虧空。及辦事勤惰之處。亦令該管官詳細填註考語。造冊送部。以憑考覈。○五年奉

旨。向來軍政之年。該管官往往以千把總舉劾塞責。似

此微員。優者可以隨時拔用。劣者原可咨部斥革。何必待五年軍政之時。嗣後千把總於軍政舉劾之處。著停止。○乾隆六年奏准。京口福州廣州將軍所轄旗員軍政。仍照八旗軍政例遵行外。其所轄綠營各官。遇軍政之年。照提督之例辦理。有應議者。亦照提督之例議處。○又議准。軍政註考違例。若不由該管官申報。係督撫提鎮自行填註者。照申報官例議處。如將舉劾官合為一本具題者。該督撫提鎮罰俸一年。○七年

諭。各省軍政五年一舉。乃黜陟將弁鼓勵戎行之要務。為督撫提鎮者。留意於平時。而舉行於此日。必公正無私。甄別允當。舉所當舉。而衆人皆知奮興。劾所當劾。而衆人皆知儆戒。將見人材輩出。士氣益勵。國家於以收干城腹心之效。所關匪淺。甚也。昔我

皇祖

皇考。加意武備。訓諭諄諄。其因舉劾不公。降

旨申飭。至嚴且切。今當軍政之期。儻司其事者。或瞻徇情面。庇護私人。將居官貪劣及衰懦闒茸不能騎射之人。姑容在職。止將微末員弁數人填註充數。而使

技勇過人。勞績素著。或秉性質樸。實心效力者。遏抑  
隱藏。無所表見。則賞罰不明。賢否倒置。人心懈怠。戎  
政廢弛。重負朝廷委任之意。其罪不可逭矣。用是特  
頒此旨。務各洗心滌慮。將從前情弊陋習。一一屏除。  
以肅鉅典。儻有仍蹈前轍者。經朕訪聞。或被科道糾  
參。必當加以嚴譴。○二十七年議准。嗣後綠營千總  
一體入於軍政。將歷俸三年。堪膺保薦者。送部

引

見尋常供職者。照例填註考語。造冊送部查覈。八法  
人員通為一本。參奏。照例議處。其引

見人員於奉

旨准其卓異後註冊。○又議准衛所守備千總五年軍政令糧道與藩司各出考語同註軍政冊內。詳送漕撫二臣詳覈具題。○三十一年議准衛所守備千總五年軍政令糧道詳覈申送漕臣細加甄別會同督撫具題。○六十年奏准各省甄別千總年終彙咨。如果無衰庸總缺應行甄別之處令該督撫等將有無叅劾緣由聲明具奏。其奏明無可叅劾省分或別案究出衰庸貽誤者將該督提等嚴加議處。○又奏准各省千

總年逾六十尚堪供職者展至六十三歲再行甄別仍可留任者送部引

見恭候

欽定如年力就衰之員濫行送部將該督撫提鎮嚴加議處至衛所千總亦照此例行。○嘉慶六年奏准衛千總分別營衛後三年甄別一次該漕督考驗年力精強辦事熟悉弓馬可觀者留任候升年力尚壯辦事熟諳弓馬平庸者留任停升。年至六十三歲精力就衰者休致精力壯健漕運得力者送部引

見可否留任恭候

欽定其候推及留任千總二次甄別均照營千總二次甄別之例辦理。九年

諭前聞張承勳年老有疾當經降旨將明俊補放杭州將軍。今張承勳來京授為散秩大臣。本日張承勳到京。即奏稱途次感受風寒不能見面。乞假數月。在家調養。可見張承勳老病屬實。若無調回之旨。仍在杭州觀望逗遛。必致誤事而後已。從前如提督珠隆阿。藩司姜開陽等。俱經朕訪知年力衰邁。諭令開缺來京。珠隆阿果屬龍鍾。姜開陽旋即病故。豈此等衰老



之員。必待朕一一訪聞。酌量更換耶。各省督撫將軍。都統提鎮及藩臬大員。俱有地方營伍專責。安可容衰病人員。日久戀棧。致有貽誤。蒙混君上。市恩僚佐。不顧公事。惟博私恩。若本人自揣精力不能勝任。即應具摺陳明。而同城官員。見聞更確。尤當隨時奏聞。乃近日相率姑容。即經朕降旨詢問。仍復含混其詞。不肯遽行叅奏。試思大員衰老多病。衆所共見。猶復曲為容隱。其官階較小各員。老病總職。及年雖強壯。不能任事。聲名平常者。更不知姑容幾許。於吏治官方。大有關係。嗣後各督撫將軍都統提鎮等。各發天

良於所屬各員留心查察外。其同城文武大員。遇有年老多病及官聲平常者。俱著據實具奏。儻仍前徇隱袒護。經朕訪聞確切。必當一併究治。決不寬貸。○

十二年奏准。凡官員甄別時。呈報考驗遲延。按其違限月日。酌量分析議處。各省副將以下。千總以上官員。如遇甄別之年。期限屆滿。即行呈報考驗。該管上司亦即隨時考察。分別應保應留。或應叅劾。詳請報部覈辦。如本員並不呈請考驗。遲延三月以上者。罰俸六月。半年以上者。罰俸九月。一年以上者。罰俸一年。該管上司未

能查出調考屬員呈報遲延。三月以上者。罰俸三月。半年以上者。罰俸六月。一年以上者。罰俸九月。其已經查出調考者免議。若本官有因年衰技疏。希圖總棧。規避考驗。不行呈報。經該管上司查出調考者。照規避例革職。○二十三年

諭

孫玉庭奏嘉慶二十二年分屆應舉行計典軍政會商江蘇安徽江西巡撫將應舉應劾各員具本分題各省藩臬兩司填註切實考語。同所轄六鎮開列等第。照例造冊咨部彙辦。所有各員密考。應請毋庸具奏等語。所奏非是。向例各省督撫於年終將所屬藩

臬道府及總兵出具考語。開單密奏。朕將原單存留。以備隨時披覽。與三年大計軍政舉劾各員。將藩臬總兵考語履歷造冊咨部彙奏者。本屬兩事。茲該督因舉行計典軍政。即請將江蘇等三省司道知府及總兵年終密考。毋庸具奏。實屬錯誤。孫玉庭著傳旨申飭。所有江蘇安徽江西兩司道府及總兵各員。著該督迅即出具切實考語。密行陳奏。○道光三年

諭。兵部議覆雲貴總督明山等奏黔省隨營世職。赴滇考驗。請就近交貴州巡撫甄別一摺。黔省雲騎尉恩騎尉各世職。向例於未經補缺之前。每屆三年甄別。

均歸總督考驗。惟該省各標協營距滇遙遠。該世職等長途跋涉。需費較艱。自應量加體恤。以歸簡易。著照部議。准將雲騎尉恩騎尉各世職。三年甄別。俱由貴州巡撫就近考驗。弓馬分別。應留應斥。據實報部。至雲騎尉揀選補缺。仍著赴滇交總督考校。恩騎尉應補千總。著照各營千總補缺之例。以營分遠近。歸巡撫提督考拔。此外兩江閩浙兩廣湖廣陝甘等省。隨營世職。有與總督所駐省分較遠者。著各該督撫體察情形。悉心籌議。具奏到日。交部再行覈辦。○又諭。兵部議覆孫玉庭等奏江蘇等省世職人員。各就本

省考驗甄別一摺。江蘇安徽兩省雲騎尉恩騎尉世職人員。於未經得缺之前。每屆三年甄別。仍照例隸督標者歸總督考驗。隸撫標者歸巡撫考驗。其安徽省隸各鎮協標之隨營世職相距總督駐紮處所。本屬隔省。往返較遠。該省巡撫兼提督銜。嗣後該世職等三年甄別。著照雲貴等省之例。准其改歸安徽巡撫就近考驗弓馬。據實甄別報部。仍令該撫移咨總督查覈。至江蘇省提督駐紮松江。凡附近提督鎮協營分。著即就近由提督考驗甄別。移咨總督察覈報部。其附近總督鎮協各營。如隸提標之江甯城守協。

並京口協鎮江揚州等營。均距總督衙門甚近。若令  
前赴松江考驗。再送總督衙門甄別。往返千餘里。殊  
滋勞費。著即徑送總督考驗甄別。知照提督備案。不  
必因隸提標。再由提督考轉。其雲騎尉補缺。仍照例  
由總督考選。恩騎尉例拔千總。仍視營分遠近。分別  
各歸督撫就近考拔。以昭覈實。○八年

諭。各衛所守備千總等官。辦理漕運事務。雖與綠營專  
事操防者不同。但究係武職。平日自當練習弓馬。不  
惟該管上司例應考驗。其引見赴部時。該部亦必先  
行堂考。於綠頭牌內填註。遇有技藝生疏者。應即扣

除。昨兵部將選補江蘇興武衛五幫領運千總崔廷  
蘭帶領引見。該弁一經開弓。即將箭放落地。實由平  
時全不演習。本應即行斥革。念其年力正強。著降為  
把總。交直隸總督留營學習。當差。此次兵部考驗之  
堂官。著查取職名。交吏部照例議處。嗣後該部每遇  
堂考。務宜認真校閱。詳加甄別。毋得虛應故事。稍涉  
姑容。○又

諭。穆蘭岱奏請與西甯鎮一體校閱營伍一摺。西甯辦  
事大臣。向遇軍政之年。會同該督出考舉劾。並不閱  
看官弁騎射。平時亦不督同操演。茲穆蘭岱因接奉



前此訓飭新疆各城大臣勤加操練諭旨。請督同西甯鎮一體閱伍。尚為覈實起見。著照所請。准其督同該鎮隨時勤加訓練。每遇軍政之年。閱看副將以下官弁騎射。再行出考。以符名實。○二十五年

諭。向來武職引見人員。弓箭生疏。降旨將原保官交部議處。吏部議以降留。兵部議以降調。殊不畫一。嗣後俱著定以降一級留任。可否准其抵銷。聲明請旨。○

三十年

諭。直省司道府廳州縣以及營伍員弁內。各督撫見聞所及。隨時察看。自必知之最悉。如查有才德兼優。誠

心任事。確有實據者。著出具切實考語。秉公具摺酌保數員。候朕簡用。履任後除公罪不論外。如有作姦犯科。身罹私罪。惟該保之督撫是問。如有貪婪不法。以刻為明。或年老昏憤不能辦事者。亦著據實叅奏。不准姑容。○咸豐三年

諭。

詹事府贊善清安奏軍營獲罪發遣劣員。不准逗遛。並請飭令地方大吏。嚴加考覈。以儆官邪等語。軍興以來。地方文武各員。不能先事籌防。以致逆匪經過地方。慘遭蹂躪。其武職將弁。平日既懈於操防。臨時又毫無布置。積習相沿。實堪痛恨。總由各該省督撫

大吏平時瞻徇情面不能認真考覈屬員任令貪劣無能之輩濫竽充數及至貽誤事機即將該員等從重治罪於事何濟著各省督撫於該管文武各員隨時嚴加考察如有庸懦不職者即行據實嚴叅毋稍徇隱至軍營失事各員業經定罪發遣著於奉旨後迅速起解不准藉詞逗遛以肅軍律而昭炯戒○又議准各直省綠營春秋兩操自副將以下大小各官均須兼閱槍礮不得專視弓箭優劣以定棄取每員演放以三槍三礮為出數中一槍一礮為合式兩槍兩礮以上為有準需用鉛丸火

藥由官弁自行備辦。如有訓練不精。施放無準者。該督撫即據實叅劾。並將各員弁槍礮出數造冊咨部查覈。○六年

諭

王懿德年終密考單內。奏稱提督李廷鈺精力尚健。韜略素嫻。惟二年之內。未經出洋等語。李廷鈺係浙江提督任內。獲咎人員。前因勦辦本省匪徒。克復廈門。著有勞績。是以棄瑕錄用。巡查洋面。乃水師提督專責。何以該員二年以來。並未出洋。是否精力就衰。抑或性耽安逸。現當查拏艇匪海防喫緊之際。李廷鈺於提督重任。能否勝任。著王懿德詳細察看。據實

具奏。毋稍徇隱。○光緒九年奏准。軍營打仗受傷員  
弁。不能射箭者。查驗實係手足重傷。准予請免  
騎射。儻有捏飾情弊。將本官及驗看出結之員。  
代為奏請之督撫大臣。照告病不實例。分別議  
處。所有請免騎射各員弁。俱令改練槍礮。凡遇  
軍政閱伍及一切操練。亦均考驗槍礮。儻演習  
不精。照弓馬生疏例。奏參懲處。其送部引  
見者。照水師章程。二五八十一等月。二十八日考驗  
之期。先期給咨赴部。由

欽派大臣會同兵部考驗槍礮。如不能合式。將該員

咨回本省。勒限演習。並將保送之督撫提鎮議處。其考驗合式者。兵部帶領引

見於綠頭牌內詳細聲明。恭候

欽定。

軍政卓異。○順治十二年題准。綠營軍政卓異各官。必須才技優長。年力精壯。馭兵有術。紀律嚴肅。給餉無虛。兵民相安。食俸已滿三年者。方准以卓異具題。由部院覈覆。其與例相符。應准卓異之人。如係遊擊以上各官。引

見未滿三年者。由部具奏請

旨不必送部引

見至引

見已過三年及未經引

見並都司以下引

見未滿三年者均令送部引

見後以卓異註冊若不候部院題覆遽行赴部者給

咨之督撫提鎮罰俸六月○又議准武職軍政

卓異必須詳慎方足以符鉅典如將有盜案之

官保薦者督撫提鎮各罰俸六月申報之該管

官罰俸一年○康熙二十三年議准督撫提鎮

濫將匪人徇情薦舉者降二級調用。申報之該管官降三級調用。○雍正六年議准卓異之官原任內有貪酷不法原薦舉官即行揭報題叅者免議。如不揭報題叅將原薦舉之督撫提鎮降五級調用。副參遊等官皆革職。若卓異後或回本任或升轉他省別犯貪賊不法之款審實者其原薦舉各官仍與卓異之官同在一省未敗露之先查出揭叅者免其處分若不揭報題叅將督撫提鎮降二級調用。副參遊等官降三級調用。原薦舉各官已不與卓異之官同在一



省。於貪賊不法之處。無從揭報題叅者。將督撫提鎮降一級調用。副參遊等官降二級調用。此等皆降實級。任內雖有加級薦紀軍功卓異即升。不准抵銷。○十二年

諭。各省卓異人員。均有現任地方之責。每當大計之年。理應先行具本。候旨交部院察議。其與例相符。應准卓異者。奏聞令其來京引見。其與例不符。不准卓異者。候朕酌量。應令引見與否。再降諭旨。如此則地方事務不致廢弛。而與例不符之人。亦不徒費往返。永著為令。○乾隆五十一年。奏准五年軍政武職薦舉

計缺定額。巡捕營。薦守備以上二員。千總一員。  
直隸省。薦守備以上八員。千總四員。山東省。薦  
守備以上三員。千總一員。山西省。薦守備以上  
四員。千總二員。河南省。薦守備以上二員。千總  
一員。江南省。薦守備以上六員。千總三員。江南  
河標。裁今薦守備以上二員。千總一員。漕標衛所。  
薦守備二員。千總六員。江西省。薦守備以上三  
員。千總一員。浙江省。薦守備以上六員。千總三  
員。福建省。薦守備以上七員。千總四員。廣東省。  
薦守備以上九員。千總四員。廣西省。薦守備以

上四員。千總二員。湖南省薦守備以上四員。千總二員。湖北省薦守備以上三員。千總一員。陝西省薦守備以上六員。千總二員。甘肅省薦守備以上九員。千總三員。雲南省薦守備以上五員。千總二員。貴州省薦守備以上六員。千總三員。四川省薦守備以上五員。千總三員。河東河標薦一員。懷豫二河營薦一員。漕標營薦一員。西安將軍標薦一員。伊犁將軍標薦一員。成都將軍標薦一員。又各處駐紮屯田綠營武職烏里雅蘇台科布多烏什吐魯番葉爾羌英吉沙

爾庫車喀什噶爾和闐古城喀喇沙爾塔爾巴  
哈台阿克蘇賽里木拜城伊犁鉛廠以上各處  
駐紮屯田官員內果有人材出衆者薦舉一員。  
○五十二年奏准卓異在俸滿以後並甄別拔  
置題補即用及仍留候升各項千總均係業經

引

見之員毋庸再行送部。○嘉慶十四年覆准湖南省  
苗疆處所添設屯守備千總等官十二員為數  
無多毋庸計缺定額其舉行軍政之處歸入該  
省營員額缺之內一體辦理。○十七年題准陝

西西安軍標三營改為西安鎮。其舉行軍政。陝西省各營額設副參遊都守等官。共一百四十餘員。按例應額薦七員。通省向准薦六員。舊制軍標原准薦舉一人。今改為西安鎮。應統歸陝省各標鎮營將備等官項內酌定。以符定額。○又題准卓異人員。續有題升推升等項。均歸入卓異案內。給咨送部。此係激揚大典。如給咨丈內有遺漏卓異字樣者。將經手遺漏之員議處。○又題准軍政之年。各省提督總兵等將履歷事實造冊。於十月內送部。如不遵照例限送部。

者。將該提督總兵照違令公罪律。罰俸九月。  
軍政糾劾。○雍正元年議准。軍政八法。除貪酷  
不謹外。其餘糾劾各官。有曾經出征受傷立功。  
若例應革職者。仍給本身空銜。例應休致降調  
者。令子弟一人入伍食糧。○乾隆二年議准。軍  
政年老各官內。如從前曾經出征效力。今係年  
老衰邁。實難勝任者。准以原品休致。令子弟一  
人入伍食糧。如無子弟。給守糧一分。以資養贍。  
其年齒雖老。而精力未甚衰憊。尚可辦事者。該  
督撫提鎮酌量仍留原任。或行調簡。俾效力之

人。不致因年老失所。○五年

諭。綠旗武職軍政年老各官。前降旨將曾經出征效力者。准其原品休致。令子弟一人入仕食糧。如無子弟。給守糧一分。以資養贍。至軍政有疾。曾經出征受傷。得功之人。雖有子弟食糧之例。其無子弟者。尚未議給養贍。並著議給。再有疾各官。曾經出征效力之人。有以老病告休者。因未屆軍政之年。轉不得援養贍之例。情殊可憫。嗣後各省除副參等大員外。都守以下各官。有以老病告休者。著該督撫提鎮。覈明該員實有出征效力之處。於題咨內分別聲明。亦照軍政

年老有疾之例一體加恩優恤。○六年奏准軍政八法除貪酷不謹悉行議革外其罷輟官有曾經出征受傷立功者給予本身空銜年老官有曾經效力今衰憊不能勝任准原品休致有子弟者令一人入伍食糧無子弟者給守糧一分以資養贍若精力未甚衰憊或留任或調簡該督撫提鎮酌量請

旨遵行有疾官曾經出征效力者准以原品休致有子弟者令一人入伍食糧無子弟者給守糧一分至滿洲蒙古漢軍外任營官如遇軍政填註



老疾曾經出征受傷及得有功牌者仍照在旗  
武職老疾休致之例分別優恤○十年

諭。向例軍政糾察年老有疾休致各官及都守以下老  
病告休者如曾經出征准令子弟一人入伍食糧如  
無子弟給守糧一分以資養贍其各省甄別候補守  
備之年滿千總因年力就衰咨部休致者亦照此例  
辦理如因人材平常弓馬生疏則例不准給朕思此  
內不無曾經出征著有勤勞之人應一併加恩以示  
優恤嗣後著該督撫等覈明實有出征效力之處於  
題咨內聲明亦照前例准令子弟一人入伍無子弟

者。給守糧一分。俾不致於失所。○二十三年議准。滿洲蒙古漢軍人等。身任綠營。如遇軍政叅劾。曾經出征打仗受傷。及有功牌者。俱照綠營之例辦理。○二十六年奏准。軍政入於計典官員。如有情願赴部。該總督巡撫提督總兵。指不給咨。勒令回籍者。許其呈明原籍總督巡撫提督總兵。給咨赴部引。

見○又奏准。軍政叅劾人員。情屬冤抑。及避重就輕等弊發覺。將該總督巡撫提督總兵。降一級調用。原報之兼轄等官。各降二級調用。其平時持

參官員。有浮躁才力不及等款者。亦照此例行。  
○又奏准。將廉能官員。屈為貪劣。題參審問。涉  
虛者。原揭之該管等官。降二級調用。總督巡撫  
提督總兵。各降一級調用。○三十九年。奏准。軍  
政糾參罷輟。年老有疾官員。無論曾否出兵。仍  
照例革職勒休。○嘉慶六年。奏准。軍政案內。休  
革千把外委。雖經出師打仗受傷。毋庸給予養  
贍。○八年。

諭。各省軍政。關係激揚鉅典。向來六法。劾參人員。循例  
引見者。均係按例降革勒休。原以甄別人材。責成既

專。自當照議黜陟。以示勸懲。昨日兵部帶領武職官員引見內。有劾叅有疾之原任湖南岳州衛守備周岱暄。叅劾罷輓之原任山西吉州營千總許大詔。均係軍政案內。應劾之員。本應照例休致革職。朕以該二員從前在河南湖北軍營曾經出力。且所叅係有疾罷輓。尚無別項劣款。特降旨將周岱暄以千總補用。許大詔以把總補用。此係朕軫念微勞。格外施恩。非可援以為例。此後軍政被叅之員。不得妄思倣幸也。○十二年奏准。凡軍政舉劾案內。劾叅有疾休致。續經調治痊愈者。照隨時休致之例。於正項之

外。加十分之五。准其捐復。又滿漢武職革職離任等官。有情願捐復原銜者。准其報捐。至軍政舉劾六法各官。例不准其捐復原銜。但此項人員。究無姦贓情罪。仍准其捐復原銜。○道光九年。奏准軍政計典。勒休官員。身兼世職。係世襲罔替者。兵部行令該督撫查明應襲之人。另行承襲。如該休員有不甘廢棄。情願赴部。經兵部帶領引見奉

見奉

旨。加恩降等錄用者。其從前身兼世職。准其留於本

身兼襲。支食世職全俸。毋庸開缺另襲。

武職薦舉。○原定直省總兵官不准薦舉。其副將參將遊擊都司守備。每二年半薦舉一次。陝西薦舉五人。直隸江南福建浙江湖廣四川廣東各薦舉四人。山東山西江西廣西雲南貴州各薦舉三人。河南薦舉二人。必才技優長。年力精壯。馭兵有術。紀律嚴肅。給餉無虛。兵民相安者。各按省分額數薦舉。准其紀錄一次。如無賢能之員。即停其薦舉。若將有盜案之人薦舉。及薦舉後現任內有劣蹟發覺。將原薦舉官皆照

軍政例議處。當薦舉時。如有劣員一併糾參。照軍政八法例。分別議處。○康熙三十七年議准。若遇軍政之年。將舉劾停止。○乾隆十一年議准。漕運總督。於二年半舉劾標員之外。又別將各省沿途催漕各官舉劾。但催漕各官。該本省既有二年半舉劾之例。自應歸各本省督撫提鎮舉劾。若漕運總督復行舉劾。事屬重複。應行停止。○嘉慶五年奏准。直省武職。二年半應薦舉一次。副將以下。守備以上。令該督撫等悉心詳查。實有賢能出色之員。任內並無違礙者。每

省准其薦舉一二人專疏保題給咨送部引

見如奉

旨准其薦舉回任候升。○十九年

諭章煦等奏查明同興前在軍營保舉文武各員辦理草率有勞績相同而棄取互異者開單請旨飭詢等語。朕前諭令章煦等密查同興前在軍營保舉各員弁有無冒濫不公之處原恐其有聽情受賄等弊即當治伊之罪此時若據所開已未保舉名單將同興傳至軍機處按名詢問伊不過飾言恐人數太多難以入奏或託言一時查訪未確記憶不真安能得其



實據。治以重罪。仍著章煦將同興所保各員。向東省  
官吏密查。如有受賄情弊。即據實參奏。再行治罪。至  
副將甯德辦事不公。已明降諭旨。將甯德拔去花翎。  
交部議處。該副將既經同興派充翼長。總理營務。軍  
營所保將弁。皆由伊登記冊報。更難保無聽受賄囑  
之事。著再行確查。據實嚴參。毋稍徇縱。其武職內如  
殺賊九名。擒賊三名之阿納布。殺賊七名。擒賊三名  
之成順等。著章煦再詢訪衆論。如勞績屬實。前為同  
興所屈抑。該署撫即據實續行保奏。照佐領蘇琿請  
賞藍翎之例。懇恩獎勵。以昭平允。○二十年

諭。嗣後王大臣驗放俸滿衛千總除弓馬平常者仍以衛缺用外。其年力精壯弓馬可觀者即於摺內聲明請旨以營缺錄用。○道光三年

諭。陶澍奏保舉副將堪勝總兵一摺。前因陸路總兵簡放乏人降旨令各該督撫於所轄副將內保奏送部以備錄用。茲據該撫奏稱安徽省現任安慶營副將長喜堪勝陸路總兵。請俟歷俸三年再行送部。長喜係道光元年六月內補授該協副將。莅任僅逾兩載。遠膺專閫之寄。未免過驟。此奏不可行。長喜毋庸送部引見。○七年

諭

昨日兵部帶領引見人員內。豫行保舉之雲南東川營左軍千總謝安邦。箭不到靶。其平日才技已可概見。謝安邦著不准其豫保註冊。並即降為把總以觀後效。前署雲貴總督伊里布將此等技藝生疏之弁。濫行保舉。著交部議處。各省豫保人員以備升用。不可不加以慎重。若技庸者得列薦章。必至技優者轉多屈抑。何以整營伍而勵人材。嗣後各省豫保武職。務須認真遴舉。擇其年力精壯。才技優嫻。不得任意濫保。如再有似此等庸劣之人。必將該員即行革職。所保之上。司交部嚴議。○九年奏准江西撫標中軍

參將。廣信營參將。鉛山營。浮梁營。永新營。各都司。九江鎮標後營。守備缺出。該總督巡撫於通省參將都司守備內揀選合例之員。題請調補。如所調之員不能撫綏地方。安輯棚民者。將該管上司降一級調用。凡有棚民各省調補營缺。如揀選未協。照此辦理。○十二年

諭。著兵部傳知各省將軍等。嗣後保送堪勝綠營都司等官。俱著自春閒開印後起。至九月止。送部引見。候朕閱射布靶。觀其挽強命中之能。以拔真才而修武備。○又奏准。江南浙江福建廣東山東武進士並候

補候選等官。有熟習水性。願改外海水師者。均呈明該督撫豫先列名咨部。飭令出巡將備帶赴外洋試驗。定以一年為期。所有帶驗出洋月日。經過地方。該將備出具印結詳悉開載。並令該管總兵於巡洋時。將該員隨帶出洋。親加考驗。果否諳習水師。不畏風濤。加具保結。報明督撫認真稽覈。並報部備查。果能熟諳水性。擒賊立功者。由該督撫保題送部引。

見敘用。其有不諳水師者。即將該員照蒙混具呈例降一級調用。若各省陸路改用水師人員。呈明

該督撫豫先列名咨部。發交出洋試驗。亦定以一年為期。如果諳習。悉照候補候選呈改等官。由出巡將備及該管總兵。一律加具印結題請改補。業經題補之後。仍復勤加考察。儻於外海不宜。即隨時甄汰。照例議處。並將冒昧出結之原驗官降一級調用。率行題改之督撫交吏部議處。至世職雲騎尉恩騎尉。並隨營武舉。有願改外海水師者。於發標學習時。即呈明督撫豫先列名咨部。分派外海各營。隨同出洋巡哨。扣滿三年。果能熟諳水性。擒賊立功者。該督撫悉

照候補候選呈改等官。一律取具帶驗出洋鎮將印保各結。分別送部引。

見咨留補用。如試驗時。查有不諳水務。及准改補缺後。儻於外海不宜者。亦照例分別議處。○十七年

諭。前據麟慶奏請將江南睢南河營守備秦盛越缺升補。淮揚河營遊擊。昨經兵部帶領引見。該守備年已七十七歲。精力就衰。河營將弁。雖不專事操防。但遇險工搶護。奔走河干。不避風雨。必須年力強壯。方足以資差委。似此衰邁之員。即守備已難稱職。早應洵

汰該河督不惟不加叅劾復請越升遊擊。是於所屬員弁既不認真甄別。又復濫行保舉。一味姑容。意存見好。殊非覈實秉公之道。麟慶著交部議處。秦盛著即勒令休致。○十八年

諭給事中曹宗瀚奏豫儲水師人材一摺。各省水師員弁。必得諳習水性。不畏風濤。方足以資巡緝。現在海洋靜謐。而武備不可不實力講求。是在各督撫平日留心豫儲干城之選。朕疊經降旨。令直省督撫於副將內保舉堪勝總兵之員。以待擢用。各督撫有遵旨保奏者。亦有奏稱無員可保者。自係意存慎重。懼干



濫保之愆。但思該督撫職司校閱。如果平時訓練有方。舉劾悉當。自必咸知勤奮。何至竟乏人材。况水師副將。亦有表率營伍之責。如有不諳水性。不習風濤者。早當叅撤。何以平日姑容。迨至保舉之時。輒稱無員可保。嗣後著兩江閩浙兩廣總督等。認真甄別。將庸劣各員。嚴行叅處。毋得任其戀棧。其有操防得力。緝捕勤能者。隨時察覈。據實保奏。以昭激勸。庶幾收得人之效。而武備益修矣。○二十二年

諭。著各直省督撫。提鎮於所屬水師陸路參將遊擊都司守備內。擇其曉暢營伍。認真操練。人亦體面。緩急

可靠者。無論曾經出兵與否。不拘名數。秉公酌保數員具奏。候朕簡用。此項人員。豫儲干城之選。必須才能出衆。為守兼優。方昭覈實。若無員可保。亦不必勉強塞責。虛應故事。所保各員。將來除犯公罪。僅處本員外。儻涉私罪。並將原保之督撫提鎮一併懲處。

二十五年

諭。耆英奏副將要缺請調乏員。懇請越級升署一摺。前因營務人材難得。降旨令各督撫留心訪察。如有才能出衆之人。准不拘資格奏請升調。茲據該督奏稱廣東撫標右營遊擊崑壽。年壯才明。曉暢營務。現因

督標中軍副將員缺緊要。請以該員越級升署。係為營務得人起見。崑壽著准其升署廣東督標中軍副將。送部引見。仍俟扣滿年限。再請實授。惟陸路員弁與水師不同。向不准越級升署。一經破格錄用。即與特保人員無異。各督撫務於平日秉公考覈。如有訓練精勤。兵民悅服。確有實據者。方准破格保奏。越缺請升。若僅能循分供職。即不得藉詞濫舉。此後特保各員。除公罪不計外。儻另有各項私罪劣款。定將原保之督撫。照濫保匪人之例。嚴加議處。不稍寬貸。○

咸豐二年

諭。現在湖南軍務未竣。賊蹤竄擾靡定。各路帶兵攻剿。需材孔亟。因思滿漢各營中。豈乏材技出眾。足備干城之選者。或因官職較卑。限於資格。無由及時自效。殊為可惜。著各該將軍都統督撫等。留心簡練。隨時考察。自鎮將以下。無論官職大小。有謀勇兼裕。或材力堪任折衝禦侮者。即行據實保奏。候朕簡用。其鄰近湖南省分。如保奏之員。可資軍營差遣。即奏明請旨。飭令該員前赴軍營。聽候欽差大臣等酌量委用。該將軍等其慎加遴選。毋濫毋遺。用副朕整軍經武之至意。○三年

諭前據御史隆慶奏保琦忠等四員。請發往直隸差委一摺。已革吉林副都統琦忠。前任福建漳州鎮總兵文興。前任雲南臨元鎮總兵常安。藍翎侍衛前任江南狼山鎮總兵順保。均著毋庸發往。琦忠等均係曾任二品大員。如果才堪驅策。朕心自有權衡。非如微末人員。無由上達者可比。何必臚列薦章。希圖起廢錄用。致開倖進之門。○十一年

諭嗣後除各省駐防營員仍准保升綠營外。其吉林黑龍江等處營員。各路軍營。均不准保升綠營員缺。以示限制。○又

諭。御史朱潮奏請飭各路軍營保舉將才。並起用告病人員各摺片。現在軍務未竣。前經

皇考大行皇帝通諭各直省督撫及各路統兵大臣。訪察堪勝將帥之任者。據實保奏。送部引見。現在遵

旨保奏者尚屬寥寥。值此時勢多艱。各省軍營將驕兵惰。非有經濟非常之士。何能申明紀律。克奏膚公。近年帶兵各員。雖一介寒畯之士。但能勦賊立功。無不蒙

皇考大行皇帝破格錄用。此外或巖棲谷隱。莫能周知。或下吏偏裨。未由自達。各路統兵大臣及各督撫。果

能虛心物色。亦何地無才。患在膜視時艱。非徇私濫保。即苟且塞責。而真才不出耳。著各統兵大臣及各該督撫。留心諮訪。如軍營將弁中有謀勇出衆。並有僻處山林。熟諳韜略。堪備干城之選者。均著不拘資格。據實保奏。候朕簡用。其有濫保庸才。以盜襲虛聲之人。謬登薦牘。將來或至失機債事。朕惟原保之人是問。至因病乞休。打仗受傷人員。未必無尚堪起用之人。並著中外大吏。舉其久歷戎行。實孚輿論。無論曾任現任。或任用未竟其長者。奏請擢用。以副朕整飭戎行至意。○同治三年

諭。賈洪詔奏滇省歷年軍務徇私濫保。輕褻名器。請飭

一律更正。一摺。軍興以來。各直省保舉軍營打仗出力。收復城池。實在著有勞績者。一經奏到。無不立沛恩施。以昭激勸。乃據賈洪詔奏。徐之銘在滇奏報戰功。無非任意鋪張。以為保舉地步。其所保之人。有並未到營。並未入滇。而得邀獎敘者。至賞給功牌。五品以上。即應奏明給獎。而該撫等竟有賞給功牌。至二三品者。其司道府及武職等官。亦公然以四五品功牌充賞。該撫濫賞二品頂戴不下百餘人。甚至興臺賤役。無不濫膺頂戴。尊卑等級。蕩然無存。疊據自滇



來川官紳。衆口僉同。姓名確鑿。實難枚舉等語。朝廷名器。以待有功。徐之銘在滇。竟敢以國家賞功之典。為該撫市恩之具。等威陵替。廝役混淆。壞法亂紀。至於斯極。不但開僭濫之門。啟倣幸之漸。即該省實在出力著有勞績人員。亦無以自別。軍心士氣。何由而振。現在徐之銘業經革職。飭令來京聽候治罪。該撫前後所保文武各員。即著該部概行一律註銷。其有實在立功者。仍准勞崇光賈洪詔於抵滇後。查明覈實保奏。以示區別。至該省各督撫所賞功牌。除六品以下仍准戴用外。所有擅賞之二品至五品功牌。並

文武各員擅賞功牌。均著一併革去。以重名器而肅官方。嗣後滇省人員。惟當爭自濯磨。仰副朝廷維新之治。於勞崇光。賈洪詔到滇後。振刷精神。力圖報效。毋得濡染舊習。自蹈愆尤。朝廷論功行賞。仍當覈實加恩。不至沒其實在勞績也。○六年

諭。前因提鎮員缺。關繫緊要。特經寄諭各統兵大員。並各疆臣。令將所保記名提鎮各員。另片密註。堪以勝任字樣。其實在不能勝任者。亦即隨時具奏。迄今遵行者。仍屬寥寥。軍興以來。各路兵勇。有打仗出力。歷保佐領參副等官者。續有勞績。無可再加。往往奏請

以副都統提鎮記名簡放。朝廷破格施恩，無不立允所請。而其人之才具識略如何，究未能概行深悉。現在軍務未竣，需才孔亟，各營帶隊將領並曾經記名副都統提鎮中。如有材具出眾，謀勇兼優，並戰功久著，堪膺專閫之任者，仍著各路統兵大臣及各督撫等遵奉前諭，詳細出具考語，隨時具奏，以備任使。或未能驟膺專閫，而材堪造就，將來閱歷較深，尚堪勝任者，亦著分別具奏。各該員現在軍營所司何職，統帶兵勇若干，或因事撤去差委，或緣事離營回籍者，均著按季造冊送報軍機處，以備查覈。其籍貫年歲

履歷。並著隨時詳細造冊咨送兵部。毋得延宕。